



Directivas davart la finanziaziun speziala "sport" concernent contribuziuns per stabiliments e per edifizis da sport

Sa basond sin l'art. 31 lit. a da l'ordinaziun davart la promoziun dal sport e dal moviment (ordinaziun da promoziun dal sport) dals 7 da fanadur 2015,

relaschadas dal departament d'educaziun, cultura e protecziun da l'ambient ils 19 d'avust 2015

Art. 1 Contribuziuns

¹ Contribuziuns pon vegnir pajadas per la construcziun, per la renovaziun e per l'engrondiment

- a) da stabiliments e d'edifizis da sport sco er da stabiliments e d'edifizis en il chantun Grischun che servan al sport e ch'èn en proprietad da las organisaziuns da sport petentas;
- b) plazzas da giugar per uffants ch'èn publicas e ch'èn avertas durant l'entir di.

Art. 2 Exclusiun dal pajament da contribuziuns

¹ Exclús da survegnir contribuziuns èn:

- a) stabiliments ed edifizis da sport ch'èn vegnids construids da corporaziuns da dretg public;
- b) stabiliments ed edifizis da sport u parts da tals che vegnan utilisads per il diever commercial;
- c) stabiliments che na servan betg primarmain ad intents da sport;
- d) implants da tir che ston vegnir construids da las vischnancas tenor l'ordinaziun federala davart ils implants da tir per il traier ordaifer il servetsch (ordinaziun davart ils implants da tir) dals 15 da november 2004;
- e) stabiliments ordaifer in chantun Grischun;
- f) lavurs repetitivas per reparar ils stabiliments;
- g) personas cun dretg da survegnir contribuziuns tenor l'artitgel 12 litera b da l'ordinaziun da promoziun dal sport.
- h) h) stabiliments ed edifizis da sport che vegnan construids exclusivamain u en emprima lingia per realisar occurrenzas da sport.

Art. 3 Inoltraziun e tractament da las dumondas

a) adressat

¹ Las dumondas ed ils documents per survegnir contribuziuns ston vegnir inoltrads al post ch'è inditgà sin il formular da dumonda correspondent.

Art. 4 b) agiuntas

¹ A la dumonda ston vegnir agiuntads ils suandants documents:

- a) formular da dumonda;
- b) plans dals stabiliments e da las installaziuns;
- c) preventiv dals custs detaglià ed offertas;

- d) indicaziuns davart atgnas prestaziuns da la petenta u dal petent (las uras da lavur da las commembras e dals commembers da l'uniun pon vegnir messas a quint cun 20 francs);
- e) contract da dretg da construcziun (per regla cun ina durada minimala da 25 onns) per stabiliments sin bains immobigliars esters;
- f) plan da finanziaziun e – sin dumonda – in preventiv dal manaschi inclusiv contribuziuns dal maun public e d'organisaziuns turisticas;
- g) attest da facultad;
- h) quints annuals e rapports da revisiun dals ultims 2 onns;
- i) cedel da pajament.

Art. 5 c) termin d'inoltraziun / scadenza

¹ Cun las lavurs da construcziun dastgi vegnir cumenzà pir suenter che la contribuziun è vegnida garantida.

² Las lavurs da construcziun dastgan vegnir dadas liber anticipadamain en cas excepziunals da l'istanza ch'è cumpetenta per quai tenor l'art. 10 da l'ordinaziun da promoziun dal sport. La permissiun na dat nagin dretg da survegnir contribuziuns.

Art. 6 d) decisiun davart contribuziuns

¹ Davart la concessiun da contribuziuns fin 50 000 francs decida il departament d'educaziun, cultura e protecziun da l'ambient a maun dals custs imputabels.

² Davart la concessiun da contribuziuns da passa 50 000 francs decida la regenza a maun dals custs imputabels.

³ La concessiun da contribuziuns vegn communitgada en scrit directamain a las petentas ed als petents.

Art. 7 e) calculaziun da las contribuziuns

¹ Las contribuziuns per stabiliments e per edifizis da sport importan maximalmain 20 % dals custs imputabels.

² La contribuziun maximala per stabiliment da sport u per edifizis da sport importa 100 000 francs.

³ La contribuziun maximala per plazzas da giugar per uffants importa 10 000 francs.

⁴ Il volumen maximal dals custs per dumonda e per object na dastga betg surpassar 3 milliuns francs.

Art. 8 f) documents da rendaquint

¹ Suenter la terminaziun da las lavurs da construcziun ston vegnir inoltrads ils suandants documents:

- a) rendaquint final detaglià (inclusiv copias dals quints, mussaments da las bunificaziuns da las entradas e mussaments dals pajaments da las expensas);
- b) descripziun da las atgnas prestaziuns (glista da las uras da lavur prestadas gratuitamain).

Art. 9 g) examinaziun dals documents da rendaquint / fixaziun definitiva e pajament da la contribuziun

¹ Il rendaquint vegn controllà da l'uffizi per la scola populara ed il sport.

² Suenter avoir fatg il rendaquint, vegn la contribuziun fixada definitivamain e pajada sin

fundament dals custs imputabels. I na vegnan betg fatgs pajaments parzials.

Art. 10 h) scadenza dal pajament da las contribuziuns

¹ La contribuziun garantida da la finanziaziun speziala "sport" scada 5 onns suenter ch'ella è vegnida concedida.

Art. 11 Cundiziun

¹ Il pajament da contribuziuns a favur da stabiliments e d'edifizis da sport è collià cun la cundiziun da represchentar las marcas «grischunSPORT» e «Swisslos» en moda adeguata. Bandieras u models da stampa correspundents pon vegnir retratgs dal post ch'è inditgà sin il formular da dumonda.

Art. 12 Recurs

¹ Cunter las decisiuns dal departament respectivamain da la regenza poi vegnir fatg recurs tar la dretgira administrativa dal chantun Grischun, Obere Plessurstrasse 1, 7000 Cuir, e quai entaifer 30 dis dapi la communicaziun da la decisiun contestada.